

明滇南五名臣遺集



~ 16
2843
4





昆明孫清愨公集

門 16
號 2843
卷 4

早稻田大學圖書館
昭和 25.6.13
購 入 券

傳直隸龐壇撰

孫繼魯字道甫號松山雲南右衛人嘉靖癸未進士初選
澧州知州以事改國子監助教歷陞戶部郎中外簡衛輝
府知府復調淮安府中官某奉命織造過淮大作威福繼
魯抗不爲屈遂誣構械逮赴京時夏言方執政力持之其
事得解或勸繼魯詣夏謝繼魯不從然而所遇非霍譚也
卒以此銜之調黎平府黎平多苗苗性頑輕殺易爲亂控
御少失宜往往激變繼魯示以威嚴結以恩信境內帖服
苗人愛戴靖州守將歎曰徒遷邊將設守兵不如得良二
千石屢陞湖廣提學道副使山西冀南道參政山西按察
使方其分守冀南境內多宗藩武斷難治繼魯峻持橈不

寬貸宗藩側目及其升按察使方出境宗藩百餘人要於路冀出私物以爲挾發其裝惟敝衣舊履古圖書籍而已咸歎息曰我高皇祖登位迄今百七十餘年罕見此官更載酒追餞而去抵任持法益堅明允大著晉中士民自以爲不冤羣有孫青天之謠兩臺交薦擢授陝西右布政使旋擢都察院右副都御史巡撫山西會有西北邊警繼魯曰虜性犬羊反覆出入無常宜主進勦以絕根株非獨徒守宣府大同遂冀其無後患也於是籌戰守之議十六條與總督萬翁達不合交疏爭論執政以前故特左翁下繼魯詔獄御史楊爵者先以言事忤旨入獄中兩人意氣甚相得終日相對作詩繼魯有詩云憂國憂民意自深諫章

一上泪沾襟男兒至死心無愧留取芳名照古今爾亦有勸君努力加飡飯浩蕩乾坤在兩肩之句獄無楮以破碗書壁因號破碗集讀書不輟時人哀之朝臣知繼魯者願以百口直之不得晉中宗藩亦抗章救辯卽前發裝肆挾者執政意堅弗能解疽發項卒晉民赴京哭之者甚眾隆慶改元言官疏其冤請恤典制可乃贈繼魯兵部侍郎諡清愍蔭一子予葬祭製文諭祭其略曰刻意操持有皎然不污之節矢心樹立有毅然不屈之貞賢聲每著於在官清望雅歸於輿論特以籌邊之議恥於苟同乃來文致之辭陷於重譴式嘉素履特介新恩云

按公墓在雲南省城西北門外一里許虹山之麓碑

碣宛然其墓額為褒忠景哲其聯語為褒揚忠節天
花燦景仰哲人宿草深墓之側即逆藩吳三桂之野
園陳圓圓梳妝臺之故址在焉 根源附注

文集

昆明孫清愍公著

後學李根源鈔輯



習杜祠堂記

余校士襄陽望隆中慕諸葛孔明為人怪陳壽以父子私
憾劉氏君臣故志三國帝魏其餘裕祭高帝以下昭穆制
度湮滅弗書不與昭烈紹漢統而偽孔明焉耳矣因考習
鑿齒漢晉春秋起漢光終晉愍以蜀正魏篡漢亡晉興心
特壯之及考杜甫詩於先主孔明往往推而尊之形於遺
祠故廟之所賦咏若曰窺吳曰幸三峽曰崩年曰永安宮
曰翠華曰玉殿曰丞相曰宗臣曰見伊呂曰失蕭曹曰三
顧頻煩曰兩朝開濟則帝昭烈佐孔明視習先後一轍即

漢氏居正統不待綱目後明也羽王風而扶世教多矣嘗
求其故則習杜皆襄陽人齒以史名晉爲能裁正桓溫而
甫以詩名唐則忠愛君國又齒之博雅自少已然甫之屬
辭乃自七齡大抵天性略同夫齒能裁正桓溫則心晉心
晉則帝漢帝漢則篡魏誦溫非望在於史甫能忠愛君國
則心唐心唐則刺安刺安則誅史在於詩其於昭烈孔明
史以正之詩以美之則君父之道著見奸雄如魏旣成尙
誅况如溫之蓄非望如史如史之賊且亂者天誅其能道
乎則二公之史之詩誠深遠矣石南憲副江公有見乎此
雅尙二公卽峴首習池祀之報功風教也祠成公參折藩
政屬襄陽知府張君裕通判萬炯推官端鳳徵余記其
大節如彼若夫習杜世家齒甫定事暨峴首習池佳勝與
祠之規制則翰墨煥然可述不可磨者今皆不記公名滙
字巨之江西進賢人丙戌進士

此先清愍提學湖廣時作也先清愍學博才高作爲
詩古文詞雄古遒勁迥絕逕溪爲楊升庵張禺山楊
宏山王鈍菴李中溪諸名公所屈服著有松山文集
餘碗集以登經兵火隻字無有偶於他書得此急錄
之以存先澤六世孫鵬謹記

根源按鵬字圖南號南村康
熙戊子舉人官泗水縣知縣

Blank page with faint bleed-through text from the reverse side.

詩集

昆明孫清愍公著

後學李根源鈔輯

溫泉偶浴

指點淵源碧溜清
火珠誰教付波臣
始分靈竅三冬暖
常住離精一脈真
冷田甯趨巖罅
熱冰心獨解玉壺春
何當共說驪山好
今古浴浴不染塵

明史事略

楊繩武字念爾彌勒人偉貌洪聲兼資文武登崇禎辛未
進士選庶常授監察御史巡鹽河東浚鹽池完逋課歲餓
設粥濟民全活甚眾妖人以白蓮教聚眾捕獲首惡其黨
立解巡按河南土賊郭三海眾至數萬率兵擒之截殺流
寇不敢犯境遂自河南回京條呈邊事召對平臺稱旨擢
命都御史巡撫順天駐遵化 大清兵入塞繩武擊却之
功晉兵部侍郎總督薊遼軍務賜上方劍繩武嚴飭戰備
大清兵不敢窺邊者逾年無何以啖喘疾告歸會關門
告警廷催赴援再令督師時病已劇猶力疾應命至豐潤
卒於道上聞震悼贈光祿大夫太子少傅兵部尚書于祭

聞知星夜稟阻不墮賊計至天啟二年正月崇明果密通
邦彥遣酋目張紳等統賊兵數千圍攻畢節以成星馳告
變爲城守計賊攻圍甚急以成獎厲士民捍禦身率壯健
出城冒鋒力戰生擒叛目口黑乍殺散賊無算餘賊畏退
旋復抱恨蟻集攻城益力以成度勢眾寡不敵密將印信
間道差送黔藩請援集眾挿血誓曰吾義當與此城共盡
爾士民家俱在城亦當協力保守於是眾皆願以死從當
是時奢賊方以重兵圍城都殺巡撫徐可求據重慶分兵
圍夔州遵義瀘州等郡安賊亦以五月圍貴陽分兵破甕
安襲偏沅以阻援軍殺巡撫王三善總兵楊愈懋道路隔
絕援兵不能進畢節城況兵不滿百以成與賊攻守相持

逾半載及七月內始聞援兵不料至卽夜遁奸吏阮世爵
等從內應之城遂陷以成自縊未死賊入署撞見遂縛以
組擁逼至鴿了賊營家屬楊定等一十三口盡遭屠殺惟
弟以榮僅存以成復於圍中將賊眾情形密書五紙納竹
筒內乘夜令以榮以一紙赴滇求援以四紙糾合猪場屯
海洞等四處歸義漢兵訂期協剿以冀犁庭掃穴以榮行
至散納溪被賊搜獲其書殺之賊於是深恨以成前後忠
謀不屈隨寸割以成於火掌宅溪之地臨死罵不絕口時
年五十有七以成子振南起南興南冠南南等聞訃痛父死
難至慘罄產募兵日備糧餉兩次援黔血戰復赴闕陳情
天啟四年先經

貴州巡撫御史侯震暘題奏請恤難臣一疏奉

旨贈按察司僉事賜葬復經總督蔡復一奏請死難之臣

宜加優恤一疏奉

旨閣部議奏經閣部准照以成子興南呈援貴州安順府

死難推官徐朝綱子徐天鳳比照四川興文縣死難知縣

張振德子張紀為父陳情並蒙優恤之例覆請優恤於崇

禎二年奉

旨有楊以成死難甚慘既與徐朝綱等例着該部查例具

覆隨經部查恤典覆奏奉

旨楊以成闔家死難甚慘其葬贈諡廕與建祠立坊均准

照例錫給以慰忠魂楊以榮並楊定等同時遇難准俱附

祠春秋致祭餘俱依議行該部知道欽此隨經吏部禮工

等部及尚書房覆奏贈以成光祿寺卿祭葬各一壇勅翰

林院撰擬祭葬等文中書科闕軸寫給廕一子錦衣衛正

千戶世襲廕襲應取嫡長孫楊琛襲授本籍建立專祠春

秋致祭並給領建祠立坊工價各等事俱奉

旨崇禎五年復經雲貴總督蔡復一等合辭題據雲貴紳

士李春華李開先等呈請死難同知贈光祿寺卿楊以成

准入滇省鄉賢祠黔省名宦祠一體致祭一疏奉

旨依議行根源按篇中間有蠹蝕無他本較對不敢擅添謹以口口代之以存真

右文一首得自昆明李厚菴太史所藏路南楊忠節

錄本中蓋乾隆間吾鄉李鶴峰中丞張月槎侍御諸

公景仰忠節因彙刊明史忠義列傳雲南通志及府
州各志所載楊忠節傳與當時名公鉅卿闡揚忠節
之作凡百餘篇而弁之以公傳及七律一章迄今二
百餘年幾經兵火而是編尚得留傳不泯其殆有陰
爲呵護者歟亟刊之以公諸世 根源謹注

詩集

彌勒楊文毅公著

後學李根源鈔輯

弔楊忠節以成畢節死難

縱橫萬馬一城孤賭命還將半壁扶宗社有靈鍾間氣河
山無恙鞏皇圖九迴抽盡腸獨熱七尺摧餘骨未枯廟祀
悠悠千載後青霜細雨淚模糊

潤墅

宇宙太勞勞乘閒且自豪烟花開伯雅自註劉表兒子酒
盃有伯雅季雅之
名 苔石註離騷竹密圍斜徑山迴護衍皋前村入圖書新
漲綠盈篙

宿山頭廢寺

江村薄暮裡破寺夕陽峰不見僧敲月空餘佛伴松譚經
應聚石警夢喜無鐘寂聽溪聲沸孤吟相夜春

麥秋喜雨

轉眼梅黃淑景移郊原晴久特相宜寧虛國史書三秀喜
得民謠頌兩歧纖潤乍迴芳草色輕寒猶戀綠楊枝太常
舊樂頻煩奏好續秋成大有詩

閣中紅牡丹

上苑春工奪紫黃移來綸閣吐芬芳色香無約逢瓊玉自註

說文瓊乃赤玉古來作雪詩者皆此瓊瑶誤矣特拈出之富貴何心冠洛陽烘采更須

勞赤帝染根端不借韓郎公門嘿嘿閑桃李不作清平醉

裡狂

昆明傅忠壯公集

明史本傳

傅宗龍字仲綸雲南府人萬曆三十八年進士除銅梁知縣事至力辦調巴縣行取入都擢戶部主事久之授御史天啟元年遼陽破帝下募兵之令宗龍請行一月餘得兵八千人明年安邦彥反圍貴陽土寇蜂起請發帑金濟滇將士而速開建昌通由蜀入滇之路別設偏沅巡撫罷湖廣退怯總兵薛來允帝多採納之又上疏自請討賊言爲武定尋甸患者東川土酋祿千鐘爲霑益羅平患者賊婦設科及其黨李賢輩攻圍普安爲滇黔門戶患者龍文治妻及其黨尹二困安南據關索嶺者沙國珍及羅應魁輩困烏撒者安效良臣皆悉其生平非臣敵臣願以四川巡

按兼貴州監軍滅此羣醜朝食帝大喜下所司議將從之
會宗龍以憂歸四年正月貴州巡撫王三善爲降賊陳其
愚所紿敗歿其夏卽家起宗龍巡按其地兼監軍初部檄
滇撫閔洪學援黔以不能過盤江而止宗龍至洪學令參
政謝存仁參將袁善及土官普明聲沙如玉等以兵五千
送之宗龍直渡盤江戰且行寇悉破乃謝遣存仁善以明
聲等土兵七百人入貴陽其愚旣陷三善安居貴陽城爲
賊耳目宗龍戮諸市軍民大快宗龍盡知黔中要害及土
酋逆順將士勇怯巡撫蔡復一深信之請勅宗龍專理軍
務設中軍旗鼓裨將以下俱聽賞罰可之宗龍乃條上方
略又備陳黔中艱苦請大發餉金亦報可初三善令監軍

軍道臣節制諸將致文武不知進退宗龍反其所爲令監
軍給芻糧覈功罪不得專進止由是諸將用命連破江家
冲蔣義寨直抵織金五年正月總理魯欽敗績於陸廣河
宗龍上言不合滇蜀則黔不能平不專總督任則不能合
滇蜀兵請召還朱燮元以復一兼督四川開府遵義而移
蜀撫駐永甯滇撫駐霑益黔撫駐陸廣沅撫駐偏橋四而
并進發餉三百萬金給之更設黔蜀巡撫帝以復一新敗
令解官卽以燮元代而命尹同樂撫蜀王減撫黔沅撫閔
夢得移鎮一如宗龍議陸廣敗後諸苗復蠢動復一與宗
龍謀討破烏粟螺螭長田諸叛苗及平越賊毀其砦百七
十賊黨漸孤宗龍乃條上屯守策言蜀以屯爲守黔則當

以守爲屯蓋安酋土地半在水外狃狃龍仲蔡苗諸雜種緩急相助賊有外藩我無邊蔽黔兵以守分愈緦臣謂以守爲屯者先發兵據河奪賊所恃然後撫勦諸種隨渡口之大小置大小寨深溝壘置烽墩砲臺小渡則塞以木石使一粟不入水內一賊不出水外則賊無如我何又令沿河兵習水戰當賊耕耨頻出奇兵渡河以擾之則賊不敢附河而居而後我可以議屯也屯之策有二一則清衛所原田一則割逆賊故壤而以衛所之法行政蓋黔不患無田患無人客兵聚散無常不能久駐莫若倣祖制盡舉屯田以授有功因功大小爲官高下自指揮至總小旗畀以應得田爲世業而禁其私賣買不待招徠戶口自實臣所

謂以守爲屯者如此然兵當用十萬八千人餉當歲百八十餘萬時當闕三年如此而後苗夷可盡滅土地可開闢禍患可永除矣部議從之會復一已卒代者王璠雖至諸事悉倚辦宗龍乃漸翦水外苗逆將大興屯田邦彥懼謀阻之六年三月大舉渡河入寇宗龍擊破邦彥趙官屯斬老蟲添威名大著當是時大帥新亡全黔震動燮元遠在蜀中城徒擁虛位非宗龍黔幾殆先是霑益安效良代邦彥遣其黨偕效良使者入貴陽探虛實宗龍覺而戮之至是兵部以燮元言將議撫給事中陸文獻因言宗龍貪功嗜殺宗龍憤抗疏力辯會貴州薦紳士民連章言不可撫宗龍亦疏爭且乞罷兵部乃令撫勦兼施諸軍遂不進宗

龍巡按踰二年詔加大僕少卿視事如故其冬又以丁艱歸崇禎元年冬御史楊通宇薦其文武兼全當世偉才請卽加節鉞逾二年起太僕少卿仍蒞御史事吏部言擢爲卿未幾樞輔孫承宗將告歸薦宗龍自代會薊鎮巡撫劉可訓罷卽擢宗龍右簽都御史代之廷議分順天永平爲二撫命宗龍撫順天久之監視中官王之心劾其怠職帝以責宗龍宗龍因乞罷不從尋拜兵部右侍郎兼右簽都御史代曹文衡總督薊遼保定軍務時罷遼東經略并其事於總督責愈重宗龍所統四巡撫甯遠方一藻永平楊嗣昌順天張鵬雲保定丁魁楚相與協謀武備甚飭初以邊警通州昌平分駐督治兩侍郎相繼汰去宗龍又奏請

廢通州總兵官自是畿輔要任悉歸總督一人宗龍疏陳邊事言邊患不足畏宜上下一心力主進取修飭兵備二年得十萬人足以出遼東直搗敵巢殄滅敵類則一勞永逸邊患可息也若專主防守則敵逸我勞守邊得其人則邊警尙可無虞非其人則後患有非臣所及料者帝嘉納之未幾郎中趙秉衡以怨劾宗龍宗龍乞罪七年七月大清兵入大同宣府宗龍整兵赴援大清兵偵知宗龍有備且軍威甚盛退還帝聞之喜賜大紅蟒衣一襲彩幣二十匹白金四十又發內帑五千蟒敝二十雜幣二百犒有功將士八月丁卯命宗龍速援宣府明日又命護昌平諸陵給事中林正亨劾宗龍不護宣府帝不問已念其勞苦復

稿如前時劄鎮總兵吳襄尤世威東援不進及解嚴兵科給事中常自裕劾二將逗遛當誅而宗龍乃以全師爲幸宜并罪及宣大總督蔡衡視職自裕又劾宗龍謂不罪宗龍無以服宗衡心乃下所司論罪削籍歸十年十月流寇大舉入四川陷三十餘州縣巡撫王維章被逮卽家起宗龍以故官代之至則上擇將增兵勤訓練肅軍政設防衛數事帝大褒納賊初入蜀眾皆咎陝督洪承疇旣而賊大挫洮河復將入蜀宗龍遣總兵羅尙文禦却之尙文數有功蜀境漸甯大清兵入塞京師戒嚴宗龍以蜀兵五千遣兩將入衛十二年五月廷推兵部尙書八月抵都入對武英殿力言民貧財匱宜節用卹民以治根本之亂帝初以

爲然而宗龍言益切帝怫然曰卿但當整理兵事爾旣退語輔臣曰宗龍所言皆言官唾餘也自是所奏請多中格時熊文燦已罷宗龍言向者賊東西無定輔臣嗣昌是以建分勦之策今各止其所臣請收勢險節短之效總理止轄楚豫秦督兼轄四川鳳督兼轄安慶各率所轄撫鎮期十二月成功因薦湖廣巡撫方孔炤堪代文燦帝不用用嗣昌帝素憤中樞失職嗣昌用權譎得主知宗龍承其後以抗直失旨會劄遼總督洪承疇請用劉肇基爲團練總兵宗龍覆議不允帝怒責以抗旨令對狀及宗龍奏上復責以戲視封疆遂下吏法司擬戍邊帝不許欲寘之死十四年春河南襄陽並陷嗣昌卒於軍兵事益亟尙書陳新

甲力薦宗龍才五月詔釋爲兵部右侍郎兼右簽都御史代丁啟睿總督陝西三邊軍務啟睿方討張獻忠於蘄黃乃詔宗龍以關中卒專討李自成宗龍議盡括關中兵餉以出而屬郡洊旱蝗民間徵發已盡乃以秦兵之在河南穎賀人龍李國奇者統之以行保定總督楊文岳以虎大威軍來會九月四日至新蔡令軍中爲浮橋期明日渡河自成亦過河窺汝甯官軍與相值宗龍等宿河口夜召諸將謀邀擊遲明偵報賊過且盡惟一軍殿後官軍至孟家莊方解鞍不爲備賊匿精騎林間日旰出鬪人龍卒先奔國奇戰不敵與大威亦奔宗龍文岳止親軍與賊接文岳營西南宗龍營東夜將半文岳部卒挾其主以逃宗龍慷慨謂其下曰吾當死久矣今日陷賊中當與諸君共死不能效他人走也乃集麾下二千人卽文岳壁掘堦築壘誓必死而檄國奇人龍援二將不肯救曰書從賊中來庸知非詐耶自成見宗龍無救穿兩濠困之十三日糧盡殺馬食十五日馬亦盡開營突圍遂大潰十九日將至項城宗龍被執賊誑稱秦軍誘守者啟城門宗龍大呼曰此賊也我兵敗被執門不可啟速用砲擊之勿以我爲慮賊怒攢刀殺之賊亦退事聞復官兵部尙書加太子太保廕子錦衣百戶子祭葬

按公一字元憲號括蒼初謚忠烈繼避莊烈帝謚改謚忠壯公配楊氏生子昌明字士諤恩廕錦衣衛

已亥 大兵入雲南偕妻陳氏及子績俱死於難
 公衣冠塚在雲南省垣西門外十五里眠犬山之麓
 聞之守墓人原建墓碑及御祭碑文 國初時公姪
 昇明星明等懼禍及悉撲匿之其殘石迄道咸間猶
 散在塚旁杜逆之亂始燬於兵云 根源補注

文集

昆明傅忠壯公著

後學李根源鈔輯



劉太僕傳

太僕卿劉公文徵字懋學雲南後衛人父體仁嘉靖中仕
 蜀新繁令遷保甯別駕所至清約惠愛衙齋種蔬自給蜀
 人稱劉青菜云以勤瘁卒於官家赤貧子七人皆刻勵向
 學公其季也幼從諸兄讀書即能灑然貧困中又從盱江
 羅公汝芳遊聞聖學益懍懍闇修弱冠舉孝廉絕迹公府
 萬厯癸未登甲第為新都令邑當天府孔道達官貴人冠
 蓋相望里甲疲於奔命公力行條編法悉令歸農時有清
 丈之役躬歷阡陌九則維均丹書典籍藏諸庫至今經界

穀祿無絲毫憊差三殿肇興取材於蜀邑當辦大木三公獨任其勞三人蘭州得美材以獻民間若不聞采木之令者賦租手爲較量稍溢錙銖卽還畀民聽訟則令訟者持檄呼被訟者片言解紛終日不杖一人累月不罰一金茅茨千家與長吏相依爲命每以公役至成都兒童連手爭覲其面是新都劉侯耶入爲比部主事光廟儲位未定一夕有林封待嫡之旨與同官六人伏蒲固爭首事者沐浴席藁公曰此舉不過各辦臣忱庶幾主上知舉朝有同心耳甚無自標質爲名也時稱西曹六君子焉累遷郎中出知廣西梧州府以內艱奔歸服闋補浙江紹興府約己裕民一如所以治新都者篤誠敬持惇大列屬同風郡大治

時山陰令屏山楊楷會稽令吳中翁愈祥俱有惠政郡人祭酒陶望齡爲三賢之詩曰東陽海壖國潮濤日春撞錢塘爲長雄帶以東西江厥宅有三山種山居中央左蔽而右竄烟雲所起藏三江何縈紆三山何低昂山腰繫大鼓阜蓋朱旛雙朱旛者伊誰貌瘦眼有芒共云劉寵孫重佩太守章太守坐聽事羣吏爭踰階中有二尹賢二尹翁與楊清心等無疵聖德俱有望金石同懸鳴椒蘭林畦芳煦人似三春映物如三光曩者捕妖人僉細乘時狂赤舌或燒城訛火將焚岡官能靜其紛制使燈弗揚日雨而獲雨日暘而獲暘吾民固無知乃爾勳穹蒼向惟虞歉收茲乃憂無箱明年大述職聖人處明堂太師采聲詩聽我三賢

日涉園三集卷之二 一 文上
章又曰古循良之政多得諸資具非關學也於公乃見學問中政事矣夫愷悌可以性近通敏可以材呈擔荷可以氣奮若夫不言之化不怒之威至靜之動至和之守非三者所能辦也遷按察副使分守浙右三府郡民焚香遮送數十里郡之龍山有祠祀漢太守劉祖榮宋太守范希文遂卽其傍創公生祠肖像祀焉初山陰朱閣學家居悉公治郡狀至是當國有汲引意公一日行部嚴州與同官閩中李開藻同登富春釣臺超然遠覽曰諫議不拜謂故人爲天子也今故人爲宰相何不高舉爲引疾乞身徑歸遺公費數百緡在官郡守遣吏越數千里齎送至里舍公笑卻之居六年朝議特授清恬用爲儀表以原官起公備兵

威清公逡巡難進或有勸公不出需後命當得京卿者公幡然曰是有意擇官也乃強起時苗患棘甚道路禦人無虛日公先以計擒通賊土目羅國權繼討花蔑抵拱河頭諸里盜魁蠟業阿袍皆就縛安定之間賊不敢窺者數年量移四川右參政備兵松潘當番虜肘腋地故不毛本色仰給川西諸州縣金錢取諸司帑率多愆期士不宿飽東路羊峒生番跨連千里素不受糜漳臘有土韃數千火落赤之部落也往時鎮守納其橐駝名馬許駐收內地生齒漸繁窺伺叵測公首重本色又括茶稅羅青稞麥數千石濟其不給多置軍仗火器轉輸不絕番人偵於墩卒墩卒曰兵使者積糗如山治兵甲如林將出師特未知所向耳

會建南兵事竣公受臺使者檄覆所糜金銀之數歸而申
傲將吏曰番虜二憾負固久不討今糧械已足又建南所
餘儲需甚多不日禡燾其秣厲以俟羊峒生番震恐乞命
因孰番以請降者六十餘寨土韃聞風徙幕北去一夕而
盡凡積贖錢數百緡貯之別駕之廨後代公者爲某君盡
攫以去臺使者劾某君乃暴其狀不然世不知公有留贖
錢事也遷廉使總臬全蜀徇寇自隴右流却川北一路無
甯宇會兩臺諸司一時俱乏人公便宜發鎮遠營兵勦之
賊匿山中月餘無所見乃露機撤兵密有指授賊聞兵退
果出至半途伏兵起盡殪之事聞賁白鏗紀錄於是選郎
胡汝政擬以京卿召公公聞之曰京朝詎貴近廉訪豈卑

乎君恩到處重如餘生無宦情何乃上書幕府遂封印登
舟撫軍饒景暉力挽之不可移書令藩臬大人詣衙齋勉
留又不可乃以狀聞謂公崇雅黜浮素節一生無改廉頑
立懦清風百世可師讀者以饒公爲知言歸自蜀遯迹卻
掃臺使者按部式其廬欲一見不可得久之日益貧青黃
之交稱貸而後舉火熹朝登極大蒐在野起南鴻臚卿三
疏上辭上嘉其清望加太僕卿致仕丙寅六月卒前太宰閔
公洪學鎮滇稔公清修與直指朱公泰正合辭請卹疏云
通籍四十年轍迹之歷幾徧而橐恒垂里居十餘載蒲獮
之徵數臨而臥不起又云家徒四壁案擁一經蓋實錄也
疏入賜祭如例禮部議贈官與諡

贊曰近世士大夫以廉自命至通顯者多矣然衷服牴牾
初終乖舛情縈雞肋色動豆羹欲以砥障流靡豈不難哉
余家城南與劉氏比屋而居者屢世而太僕公夫人爲先
慈姨母以是知公最真每望晨突不烟知公甌中無粟家
人甚病而公泊然若將終身以余耳目所覩記公蓋天下
一人而已使公入秉衡軸以風勵天下卽毛玠楊綰何多
讓焉惜乎強半謝病所用於世者十僅二三然范丹爲令
以塵甌稱劉寵爲守以一錢聞趙清獻鎮蜀以琴鶴名公
可謂兼之公不朽矣

署祿勸錢公惠政碑

祿勸自逆祖受誅而後不四十年克舉之叛繼之未幾而

壬戌之變復相踵焉議者率以祿勸之彝狻而悍與東川
七州錯繡而窟穴可恃故其動最易也是不然人情不甚
相遠彝雖叵測亦有父母矣亦有妻子矣亦有生畜田產
之可戀矣獨何心而甘爲叛逆至身戮家亡而不顧而不
知其有所激之也激之則自通把代徵夫通把之立不過
設流之初謂彝與官不相習擇通彝者而代其徵庶幾便
於彝云耳孰知立一通把隨加一狼虎正額未已也而火
耗數倍之火耗未已也而雜派重科之而且爲下程之例
而且爲拜見之規一牛一馬之苗壯者假府州之所用兩
吞噬之一田一地之膏腴者以此須之債利而准折之生
畜園產不空不已兒女妻子不鬻不休彝至此而精枯髓

竭矣故一夫首倡而衆心響應則與死於管馬之酷虐無甯甘心一逞耳此亂之所由釀也官茲土者類以傳舍視官贅疣視事從未灼見而大劑之者此管馬一節遂成積重難反之勢而亂之所以相徇而未有已也錢侯以癸亥夏代政祿勸縣性慈和才具敏達甫下車卽與衆矢諸神口敢有徇於私拂於公利不與害不除者有如誓厥後均賦役省供億戢强暴安善良賑窮乏興禮教種種惠政悉爲推行惟管馬一事鬱鬱然朝夕不釋仍之而剝膚之漸旣所不堪革之而催收之難又恐不足侯虛心採訪乃與其鄉耆有德者深入他頗等界月餘遍歷各馬悉得其狀嚴諭各馬爨曰一應糧稅親身認役盡革去通把輩不令

復入有一票而沿途遞傳每一馬而互相保結迨及秋徵而各馬爨日疾趨輸將先者獎勵之不踰月而二十七馬無一逋負者豈爨之有所私耶避橫徵而供惟正情翕然也是冬黠酋因保甲之嚴身無所匿遂受擒焉嗟嗟催科不擾而爭輸子來苞苴一清而奸宄斂迹此孰非以爨治爨之良法哉宜合州士民尸而祝之感不容口更慮後之射利者出久而或更相謀爲不朽計乃遮道鳴諸直指羅公撫軍閱公兵備莊公各嘉賞之准令鐫石紀政自是而美意良法炳如日星雖狡猾舞文之徒不得越成規而復害茲邑矣幸哉祿勸之患於是始杜患杜而祿勸甯祿勸甯則武陽固武陽固則全滇始安父母之惠豈曰小補之

日涉月三各目集之
六
X L 文
哉爰爲之記以爲不朽云

重修法明寺記

嘗觀迎氣畢張人心靈動賢士大夫帥先董正以教者英
碩彥信服景從以善在上善政在下美俗考風者所嘉與
也余自解組歸杜門却軌幽討三聖一燈之旨閒從一二
衲子屈指梵天名勝維昆左笮箐峯高幾與碧雞爭麗東
望鬱葱意將有人起於其中而未敢定其候也適有蜀僧
圓慧者以重修宜良法明禪寺丐言於余詰其由知爲祝
釐重地詳其事則經始於丙寅落成於丙子其捐俸引導
者邑侯楊公述明溫公調元宋公階吉實尸之邑子弟率
謹唯命者半邑中夫是剏稔闢創自漢興於唐興寬僧再

興焉復漸就圯茲者鐘樓增壯雲堂爭麗大士有閣伊蒲
有饌門闌西折而北望鐘靈蓬萊諸峯心自灑然一變此
之構宇恢局乃丹堊元黜悉慧勤其緣遡其鳩工庀材之
日正邑士卜遷賢序伊始之年也今聖宮翬翟乎上斯剏
拱峙於右洪鐘戒曉高呼振嶽飛蕤齊雲浮圖干霄舍利
掩映文章競爽豈非洋洋巨觀也哉然而捨心殫力可謂勤
矣宜良人士何以得斯蓋聖人隱發人清夜之思因以神
其教慨塵勞幻夢中自非因明覺悟且求一念庶幾於道
而不可得又誰能割蠅羶驚逐之垢以成茲淨正緣乎如
宜良人士者我是知其難矣於焉人文蔚起後先焜耀詎
非以般若心應宰官身爲得度歟至若祝延萬壽遠賜錫

風又其大焉者矣是爲記

普照庵記

武定城東二十里許地名的多峯翠萬重泉流九曲其西南一山峭壁蒼松望之慈雲碧映慧日光浮者普照庵也庵之僧性用性寬儒質來自賤詔卜此結茅而居時檀越星安董君知其戒行不二遂爲倡募創建殿堂廡廡一時好施之士相與有成且置常住田若干畝爲庵計永久夫照以普言言無所不照也佛氏一切皆空照且渾之普於何有雖然惟始於空而能無所照能無所照而能無所不照彼夫照古今而不尸其名照世宙而不耀其采照醇良而善根愈植照黨邪而匪萌頓消城狐社鼠之匿形也南畝西疇之大稔也山林澤藪之咸若也洵無所不照而又莫得其所爲照也則空矣惟空故照惟一切皆空故普照其是庵命名之意乎卽以爲是庵碑記也可

滇疆危迫請旨發帑拯救疏

臣滇人也冒險出滇爲鄉人乞旦夕之命謹以臣鄉危迫之狀爲皇上陳之方奢酋之發難也臣鄉之文武大吏投袂而起縉紳庶士聚族而謀簽曰蜀與滇唇齒也無蜀是無滇不憚征繕以俟朝命旣而曰蜀危矣朝命遠恐不卽臨襄輝而前不遑啟處不謂天禍滇國又生黠禍以分覆滇師都司楊明廷以三千人敗歿於畢節參將尹啟易等一聞敗信卽自烏撒奔回而霑益炎方松林皆不守平夷

衛遂爲士婦設科之黨李賢所破矣都司李天常以四千人敗於疊水矣尹啟易又以三千人爲設科之數千人所敗而交水及曲靖城外之村屯焚劫殆盡矣武定尋甸嵩明之間日尋于戈無一日不傳警報矣逮援兵四集而東川之賊乃始出巢幸也天之不以滇予賊也土官沙源再戰再捷而後賊酉殲賊眾潰滇之會城免爲成都之續也嗟乎滇人之濱死者屢矣被兵之處不忍言矣水旱連年四金而易米一石行賈居送祇爲盜資避難流民顛連載道卽受塵附郭者倏移入野倏移入城憔悴饑疲無復生理每謂遼人巴人最苦不幸滇人又身罹之今東川業已遯歸霑平已次第收復天暑盛雨寇必潛迹驚魂似可粗

定矣然一賊未除司帑告罄兵以無餉而難聚賊以無兵而復滋九月十月之交禾已熟而未收是資寇糧之日也且按臣楊春茂行矣撫臣沈儼烺行年七十拮据愁苦通身是病矣司道各官察處者差行者接踵而去現在會城者僅林士標一人迺西僅徐穆王之機二人迺東僅聞傳一人監軍惟有黃士華而憂讒畏譏日求解任亦不過掛空名而已至於將官中能勝討賊之任者更無一人撫臣卽竭盡心力不敢告勞而一心兩手安能應日新無窮之機務耶臣等觀其癯貌楚楚可憐惟有相對太息而已雖有城而無兵欲增兵而無餉旣無兵餉又無將吏以調度之皇上誠一垂睿思如此光景滇南能不論爲絕域乎尙

能保一年無事乎臣寬假省親於去年十月抵里方期叱
馭而前所遭地方大亂臣自分必死於賊永無事皇上之
日矣茲獲苟全性命皆皇上如天之庇也臣懼與全滇億
萬生靈並膏原野萬不得已循漢丞相諸葛亮征南舊道
從鎮雄入雄安從苴却渡金沙江而入會川遂從建昌渡
瀘入蜀今已抵成都矣臣之勉爲此行也仰奉簡書圖畢
力於理鹽之役臣之志也然冲炎犯瘴割父母妻子之愛
而冒險出滇爲鄉人乞旦夕之命於皇上尤臣萬不得已
之至情也臣之所首懇於皇上者乞嚴勅新撫按及新推
司道諸臣從建昌刻期入境受事蓋此時黔路已斷粵西
亦有一路可通而夏秋瘴癘爲虐或諸臣所不敢輕涉瀘

江雖有瘴而不甚毒且臣可以來而諸臣獨不能往乎諸
臣入而法令一新盜賊亦當斂手此救滇第一急着也撫
臣所題請就近推升及添設將領諸務亦望皇上勅下部
院速見施行早得一人入滇卽得一人之力其次則請發
帑金皇上于東西交訖不惜傾儲以供軍費薄海內外無
不謳歌卽加派未停不敢懷怨夫滇亦一藩省也顧不能
當西蜀之半乎乞皇上慨賜三十萬金與蜀並運責令蜀
撫差官轉運入滇以爲滇兵續命之劑仰見皇上慈愛仁
明不忍一物失所其不忍以三十萬金棄滇可知也且臣
之求原不侈也其次則請嚴諭督臣張我績乘取重慶之
聲勢速勦奢賊卽乘勝以勦東川若奢賊未卽就擒亦須

分兵從鎮雄烏蒙先平東川爲臣鄉除腹心之疾臣鄉原無一事以救蜀而全省皆搖督臣能不念滇而早引手乎東川先平次及鹽倉滇兵可與蜀會卽百奢酋無能爲矣其次則乞皇上諭令蜀中撫按開通建昌臣鄉在天杪蓋白玉斧一畫而滇不通于上國太祖高皇帝混區宇自黔取滇取蜀今之東西二路是矣太祖遣將南征亦有貴州原非正路之諭以蜀中未下故不得不先從黔入耳今黔省傳聞未破則東路尙有可行之時然不可以歲月計也粵西又未開闢則舍建昌何適乎必建昌開而後有入滇之仕紳必滇與蜀氣脈流通而後可合力以圖賊此理之一定不可易者臣親履其地求其利病而力爲調停亦不

過給應得之餉補原額之兵假便宜以殺賊而取山澤之產以濟驛站之窮不必創非常之原而兩省可合爲同室矣若廟謨獨斷肯以會川改隸雲南聽其制置而自建昌至黎雄責之蜀中尤覺便宜以會川至滇僅九日而至蜀必一月遠近之勢異也臣已將彼中事宜面告之按臣張論書達之撫臣朱燮元矣兩人俱爲社稷業有同心然非明旨諭行恐竟作道旁之議也今日之勢似蜀急而滇緩然滇亡則蜀必不能獨存其奢賊一窮不入建昌則走東川故滇之可慮猶在蜀之上也通建昌以安滇實所以破奢酋之後窟也滇蜀合而俱安無憂黔矣庶西南半壁終爲朝廷有耳臣暗淺無奇又奔走困頓條上鄙見莽率

無倫而區區之心苦於怔忡望皇上之一爲憐憫也

重修崇寶山正覺寺碑記

距滇城西十里許有山名曰崇寶其山層巒聳翠疊嶂靈奇誠鍾英毓秀之佛地也擬始自元之大德間建刹名正覺繇是里居人士咸嚮正覺宗脈立朝右者代不乏人隱巖谷者風亦甚樸迨至國朝宣德間歲久寺傾黔國沐公遣官李文秀鼎飭之夫文秀者乃先住持悅顏長老之侄也及至日久椽瓦朽落住持芳詮於成化間復重修之斯亦古刹之煥然矣云何居諸歷遠風雨剝摧舉昔之煥然者又將復爲荒址矣里中人尹氏念茲梵宇幾廢遂盡捨其田宅入寺禮真善和尚始雜髮名如然更募而增修之

里人衆善姓杜必登董周言等與有力焉寺依山立山石峭兀幽崕勢若鬼神其後旁植竹木陰翳盤曲與龍池相映龍池者如然結願禮華嚴之所出也其先寺外田土坐居雷鳴農恆苦旱自如然禮華嚴三年不衰行通上界忽寺左右竇間湧清泉而不絕因而爲池深三尺許廣未及丈旱不涸而集不溢百畝之稼穡是賴焉茲其神最靈前田因應僧吞迷神動鄉耆清理如然捐贖外尚有勢占不吐者俟再行查崇禎甲戌年旱直指使姜公藩使王公全黔國上公禱雨踵寺共酌池水異之因留詩及小說記勝題曰華嚴甘露是故如然雖歿而觀奇蹟者猶敬信而樂道之抑又功德之可傳也其徒性遇戒行嚴淨一如其師

日涉園五名目卷之二
十一
XLI
余賢而擇之住持慧光性遇常爲余言事如然三十年見其梵行堅忍惟供佛濟物爲願日誦經書直買常住所存田畝龍池及斯寺耳性遇恐其師之可傳者入或漸滅則師之苦志日泯矣乃求余文爲記余維世未大治以民趨未作而尚私畜趨未作則蕪其田土逋負以憂其一尙私蓄則爭其父兄子弟而不知卹今崇寶鄉民禮讓相持而勤其耕讀非如然師弟先能以龍池水洗淨塵根裕一化導之力也哉龍池具在性遇能終其事傳之其徒繼以不倦清流白日自炤其心則入功德水繇一滴見華嚴性海庶幾共印正覺乎則其人與寺可永不廢矣

重修寶珠山能仁寺記

余丙辰觀闕事竣乞假歸省李玉案質甫氏實偕余南余出都門有詩云長安城裏望時亦見西山未似當歸路爲能開笑顏吾家近巖壑晚歲喜躋攀若作山中夢滇雲咫尺間以吾里亦有西山形勝頗相彷彿故也質甫詠余詩云公其有安石東山之思乎余曰昔人云飛鳥戀故枝游魚念舊淵安石雖富貴不忘東山余豈能忘西山乎質甫曰西山之名勝多矣吾家石鼻之下而登眺石鼻之上耳目之所覩記幽竅秀絕莫如寶珠公亦嘗識面否余於寶珠望而知之實未嘗投足其中也質甫與余連榻爲余說寶珠之美余之神情夢寐已在寶珠之麓矣及抵里質甫從山中招余余同伯兄掉扁舟而往友人楊少逸偕質甫

來遊時新秋暑退林木蕭森從溪邊宛轉入山漸歷靈境
余因誦東坡廬山詩云自昔懷清賞神游杳藹間而今不
是夢真個是廬山復揖質甫曰賴公先容不然余今日未
免爲生客也旣入寺禮佛卽陞山顛尋瀑布飛流噴吐錯
落如珠蓋此山之所由得名也瀑布之左石巖欹竅狀若覆
屋借草趺迦而坐酒不記巡醉輒卧醒復起飲已而大叫
狂呼聲振林谷陰雲四合雨如傾盆瀑布之流頓增百倍
乃令監酒者揚野人致一韻詩不成者罰之余詩云爲人
招提覓素秋又將幽夢枕清流雨絲忽共飛泉落雲蓋平
臨遠岫浮黃葉滿巖供作字青林呼鳥代傳籌良朋此日
孰佳勝不惜空山薄暮留詩旣成天色已暝而雨不少休

去寺旣遙燈火不可得到數人擁膝聯袂相戒勿亂舉趾
但聞風聲雨聲泉聲蛙聲一片騰沸而已夜半雨止始得
火踏泥下巖投寺如歸痛飲就睡平生游覽之興未有若
此行之豪者蓋山靈有意相譁助吾輩之狂耳明且讀廡
閒舊碑乃知茲寺創建於元至治辛酉其所從來久矣主
僧言本朝正德中遭回祿鄉人捐資新之歲久復圯今萬
厯壬子以來鄉人復捐貲新之工程尙未竟也幸居士辱
臨敢以異日碑文爲請予最愛此用且喜鄉人之能恢勝
蹟遂許爲之比予入都待命又復假還則寺工落成久矣
寺故有常住田若干畝爲怙強者奪去鄉人訟官得復又
集諸大部經若干卷永供寺僧誦閱又四山頗多佳樹操

斧斤者時睥睨之鄉人立約巡 豈得侵盜者卽供首治環
觀西山一帶都若禿翁茲山之蒼翠深隱鄉人之力也噫
彼之奪常住而覩樹思以爲薪者獨何心哉主僧天蒼等
告爲勢占事隨將各犯竝鄉約曾衆拘喚到府當堂審明
看得蘇應詔蘇應和蘇清明蘇熊皆總府家人也住近寶
珠寺年來倚恃威勢將寶珠寺出一十餘畝捏寫查田強
占爲業復逐寺僧寂空三空遠遁使滅其跡昨見僧天蒼
同地方人蘇崇化等數十餘人出首又願出銀六兩并認
約一紙買求此等奸宄所當亟行正法追出原田給還本
寺以儆頑民者也買求贓銀六兩入官蘇應詔蘇熊和各
擬杖其認約內銀姑免追取供枉卷今據前因相應准從
合行給帖爲 此帖仰告人天蒼等執收日後倘有蘇應和
等稔惡不悛仍踵前弊倚勢家人抗違公斷復欲逞刁妄
行占種田畝生事僧民者許其執帖赴告以憑依律究治
不貸須至帖 者舉前志爲言余爲述往日游山之崖畧以
記之

詩集

昆明傅忠壯公著

騰越李根源鈔輯

過山海關時奉命總督薊遼

望入中原第一關巍巍天塹豈宜刪
河聲東下趨遼海地勢西連到
蜀山豹尾成行金節重虎牙列隊
玉驄閑年來但覺彫零甚野草原
花滿目斑

宿邊城望軍營

獨上邊城憑曲欄戎旌獵獵背人
看月華千里夜笳動星彩一天秋
帳寒只恐驚鳥棲不定其如旅雁
度猶難愁來顧影頻搔首燈暗軍
門漏漸殘

圍營秋夜

連營四面賊氛侵
嫋嫋秋風入夜森
月慘項城刁斗寂
星昏弧矢陣雲陰
孤軍破碎誰堪戰
一死倉皇未了心
國計不能期共濟
身家何事更沾襟

春郊

花醉雲癡百草芊
柳絲遲日繫輕煙
遊人到處春郊暖
競典春衣作酒錢

長安迎春

幕府春光蚤秦城
淑景酣雨催花冉冉
風櫛柳毵毵秀滴
驪山翠嬌明渭水
藍天涯孤宦久倍
覺憶滇南

祿豐王忠節公集

新豐王忠節公集

明季忠烈錄

王錫袞，豐縣人。天啟二年進士，改庶吉士，授檢討。崇禎元年，官至少詹事。二年冬十一月，大清兵入塞，陷遵化。下督師袁崇煥獄，錫袞抗章為崇煥白，寃有蘄遼督師非崇煥莫勝等語。疏上，帝怒，幾遭譴。繼幸寬免。七年七月，大清兵復入塞，京師震動，廷命大小臣工言事。錫袞疏言：歷年邊事之失策，胥由任將之不得其人，而任用不專之故。侃侃數千言，力請以盧象昇專任邊事。十三年，擢禮部右侍郎。明年秋，尙書林欲指出視孝陵，錫袞以左侍郎掌部事，請祀吳興弼、羅倫、章懋、呂柟、蔡清、陳真晟、王良、羅洪先、鄒守益、羅欽、順、顧憲成於學宮，不允。復抗疏請

日... 罷廠亦不允二月帝再耕籍田錫袞因言頻歲旱蝗三餉
疊派請量除加徵嚴核蠹餉俾農民樂生不至困而走險
又以時方急才請召還故侍郎陳子壯顧錫疇故祭酒倪
元璐文安之且乞免江西巡撫解學龍少詹事黃道周永
成加恩錄用不允帝納真人張應京言加尊天地水三官
爲大帝應京又請論中外一體尊奉慶賀錫袞言三官號
不經且爾來游惰奸民多竄入白蓮無爲諸教所在充塞
若許慶賀害不可勝言并請斥逐應京用清輦轂不納欲
揖還朝錫袞調吏部尙書李日宣下獄遂掌部事疏陳剿
撫流寇事宜下廷議未幾丁母憂歸里隆武帝立顯勅召
拜禮部尙書東閣大學士錫袞得勅召集滇中子弟得三

千餘人赴行在適土酋沙定洲作亂中途被劫沙逆欲假
之以資號召不從遂遇害臨死留有遺詩一章以見志大
聲叫曰天其欲終亡我大明宗社也我死不足惜其如中
原之永於沈淪何越二年其子咨翼陳情禮部具題奉旨
贈太子少傅賜葬九壇謚忠節廕一子世襲錦衣千戶
宣統庚戌根源有騰永邊界之行除日宿祿豐偕劉生
欽丞謁公墓於城東十五里之公雞山墓碑破爲四段
集而讀之上刻明授東閣大學士禮部尙書翰林院侍
講兼吏部左侍郎謚文毅王公錫袞大人之墓傍刻嗣
男咨翼咨馮咨明奉祀墓聯刻風節同河山並壯文名
與日月爭光墓之後山約里許有勅旨欽賜祭墓碑一

道明日元旦劉生復偕至明倫堂得何太和嵌壁碑

明大學士王文毅公事實紀畧

公諱錫袞字龍藻號昆華一號仲山又號念昔別號素齋世居祿豐縣城北大北廠先代及公塋墓在城西蓮花山與建學王蘭溪先生同里同姓不同宗公自幼英敏篤學讀書邑東山古林書院寒暑不倦中萬曆四十三年乙卯科舉入天啟二年壬戌科進士改庶吉士授檢討由翰林歷官大司成詹事府正詹吏禮兵部侍郎尙書掌翰林院事教習館員纂修玉牒實錄總裁經筵日講枚卜三次晉東閣大學士一代醅儒千秋烈士勤王矢志殉國殺身欽賜祭葬諡

文毅崇祀府縣昭忠三綱鄉賢各祠生平事實載明史列傳及鄉賢遺錄

隆武二年

皇帝敕諭輔臣王錫袞國家休明之日固資啟沃大臣時勢迫促之期尤賴保衡上宰朕以不德嗣位大寶四方日感集先虫蓼王先生繡口錦心冰腸鐵骨處則爲安石之泰山出則爲傳巖之霖雨久虛襁保之席足當更老之榮祈念高祖之封疆先皇之重遇早蒞經筵並調方畧此日之周召賢於去漢之二疏矣廢食以待勸駕無遲

勅晉東閣大學士禮兵二部尙書督師雲貴湖川廣

五省軍務便宜行事特召入直王錫哀

風節亭恭紀

臣錫哀兀坐院署風節亭中將近四月一籌莫展萬
千苦惱日日逼來而念頭常定謹盥手焚香昭告於
皇天后土之前曰錫哀遐方賤子辱我

烈皇帝拔擢隆恩始終禮遇甲申三月之役恨不獲
相從地下祇以母氏慈魄扶歸未甯與先臣通議公
捐館二十餘年贈典屢膺封署尙關山頭宿草一望
魂銷今夏初草結土石私計可以隨時畢初志矣適
今

新皇龍飛海甸闢網旁招界臣以號召恢勦等事曾

不逾日再晉閣銜且於滇在事諸臣勅中諳諳及哀
凜茲大義胡敢苟安勉強應命實欲以報

新皇者報我

烈皇帝遭迓多艱爲賊臣夥計困厄會城進退維谷
日與諸魔鬼作鄰甚至煌煌額敕爲中貴臣萬里恭
捧而來者亦抗拒不容出接悖逆如此是尙知有
朝廷也哉封疆重吏不惟不能匡正而反搖尾聽之
滇事真不可言矣臣衰血性具有義憤常結惟有捐
軀如赴俟時而行卽閨中諸弱息者流亦饒有鬚眉
氣如腊月四日之事大概可想見臣復何言惟是前
此中間如委曲出疏皆一般宵小播弄成篇屬草改

竄推敲雖字句無所不用其極更有一篇沒天日的
文字不識構者是何肺腸以撫軍恐被人識破而止
犬豕不食其餘是豈臣袞所忍見有主使者有佐助
者其人可慙而指也近又迫挾出咨參楊道矣青天
白日之下魑魅公行眼見

新皇屬望感心萬不能副恭讀

御製旨云朕有堂堂不怕死之身有是

君定有是臣臣願身任之以對揚我

烈皇帝

時隆武二年十二月十日臣錫袞稽首謹恭紀

詩附
根源

按詩已刻入
詩集不贅錄

王文毅公風節亭恭紀紀後

嗚呼運勢之難致使社稷大臣以憤惋不平之氣發
為莫可如何之辭斯時之事尙可言哉予嘗論古之
至忠人事與天事俱全者郭令公也人事全而僅得
天事之半者諸葛武侯也人事全而卒無得於天事
者文文山也天事去而無所用其人事者顏魯公也
至於天事去而無所用其人事則忠臣義士之心較
苦而其矢志更專而靡他矣當魯公以隻身困於希
烈如肉在俎上無文山義士可以號召無武侯時三
軍可以一勵死報國外訖無可為予故曰天事去而
無所用其人事者此也吾滇先相國王公昆華先生

在烈皇帝時聲望表表著於海內守制歸里後烈皇帝以甲申之變殉國升遐先生乃於隆武二年受號召恢勦之命晉銜東閣當斯時也先生之志直欲遠媿郭令公中興再造雖武侯鼎立猶非所期何況文山然而沙酋叛逆滇事已非先生初困於祿豐繼困於會城堂堂不怕死之臣已落賊手雖有一腔熱血豈能推置賊子腹中嗚呼此風節亭恭紀所爲作也丁亥之夏逆酋沙定洲率遣其黨刃先生於院署不知者惜先生不早避其鋒又孰知先生之志斷然自矢成仁取義出於素定也哉先生沒後二十餘年予始得見此紀于長公景鳳所周公無金滕之書雖有

風雷未必見信苟息不遇李克之難卽以死繼之之言後世未必深許以爲真能不食也然則先生對揚大節得斯紀而益彰斯紀自誓數語於先生之死而益信予故詳述於此後有良史欲觀先生之烈者俾得以覽焉玉案山樵郭之建

讀書養氣修德全真才兼文武學貫天人君親能事竭力致身勤王殉國取義成仁文詩恭紀血淚並陳高風大節孝子忠臣楷模後學松柏前因蓮山千古景仰常新

詔命選舉孝廉方正暫賜六品頂戴以備召用嘉慶癸酉選拔進士朝考二等候選儒學教諭邑後學何

太和恭纂謹贊并書

通邑後學公議謹鐫立明倫堂西壁

咸豐三年歲在癸丑孟春之吉

又至尖石寺得公所書古石禪林四字款署天啟癸卯
昆華王錫哀書及堆石霞三字臨風懷謝四字又古石
凌空撐起半天日月慈雲結蓋沾來大地山河兩行聚
就千頭石半壁生成一朵雲兩聯皆松木鐫刻年久朽
壞僅存痕跡耳按尖石寺在城東三十里文毅公讀書
其中原建有樓已圯今僅遺石臺故址及洗心池焉其
臺高十二尺何太和重修一亭於其上題額曰王文毅
讀書古蹟聯曰人奮地俱靈誰謂窮鄉僻壤中做不出

天民國士樓傾臺始建須知遠矚高瞻處仍維思孝子
忠臣又於石雲菴得別有天三字土主廟得威靈顯赫
四字寶泉山得寶泉山三字城南三里之關帝廟得真
英雄三字款署天啟丁亥邑人王錫哀書大北廡公之
祖祠得門聯一付不負君不負親不負師肅肅千秋祀
典有是功有是德有是言綿綿百代書香又得殘碑數
段苔蘚駁蝕字跡模糊剔視存翰林院侍讀裔孫王錫
哀謹十一字餘則漫漶莫辨凡公所書大小各體字畫
剛勁無愧一代名臣瞻仰之餘肅然敬起旣而斜日西
下蔓草荒煙觸目增感循途歸寓日已曠矣夜間和壁
人孝廉過訪談及城北八十里青蓮寺寺後爲西蔭

和尚汪藏海墓其墓志公所撰書城東六十里羅次縣屬之斜峯寺係公所建碑記尙存並出公手書冊頁三篇家譜一冊見餉內載公傳云

王錫哀係雲南右衛軍籍祿豐縣學生中萬曆四十三年乙卯科舉人天啟二年壬戌科進士初選庶常丁父憂陳情終制 欽賜馳驛扶襯歸墓守制在里憫民病涉新建飛鳳石橋三磴服闋補任檢討尋遷編撰六年丙寅齋 皇太子詔回滇有周貧掩骨義助婚喪等復命陞侍讀崇禎四年同考會試官取卞應聘等俱名士及晉南少司成博 極羣書手不釋卷著有經書解義及溪適草等詩文集十卷七年甲戌

以洗馬掌司經局隨晉左右宮諭公卿會推枚卜一次丙子七月奉 命典試南都錄張曠等號稱得人十年丁丑四月 欽差册封桂王中子爲永興王隨拜南大司成公卿會推枚卜二次乃同大司馬范景文糾叅閣部楊嗣昌一時權要俱爲斂跡十二年己卯陞詹事府正詹十三年庚辰遷少宗伯掌翰林院事教習館員纂修玉牒實錄總裁經筵日講每以勤聖學戒奢逸親仁賢遠邪佞爲勸著有晉呈御覽講章三卷帝嘉納焉十四年辛巳八月 懷宗釋奠先師有真人府天師自請隨駕幸學公劾奏立止天師竟不得入廟疏傳天下僉服爲不巧正論十六年

癸未大冢宰李日暄部院科道等衙門三次會推枚
卜第一因權奸植黨樹私從而中阻勅命復推再
推竟爾遺名朝野失望幸帝聰明睿智燭奸如神
面諭公曰爾王錫哀萬里孤蹤獨無黨援特命爾吏
部左侍郎清理銓政任用務須得人倘有奸究許爾
不時密奏秩滿加正二品服奉賜三代誥命廕一
子入監讀書誥封通議大夫時有閣臣李建泰奉
命督師帝親餞於正陽門外密詢建泰曰廷臣之
中儔可任爲心膂建泰曰廷臣有王錫哀者向同臣
典試南畿習知其爲人忠純謹飭識力過人惟是臣
足當重任帝深然之三月丁母憂欽賜馳驛歸

蕤時流寇蹂躪中原詔晉東閣大學士禮部尙書
兼兵部右侍郎總督雲貴湖川廣五省軍務號召各
土司兵恢勦流寇公趨召至滇會城適遇土酋沙定
洲叛亂懼公誅討陰謀害之密令叛黨張國用社其
非等於丁亥四月十九日黎明時奪門搶入貢院公
色不變正襟危坐叱眾賊曰爾等叛逆欲殺吾耶吾
本朝廷大臣誓不與賊俱生遂遇害於至公堂上大
罵不絕而死後子咨翼陳情禮部具題奉旨輔臣
王錫哀一代純儒千秋勁氣奉先朝之勅命矢志勤
王及劄極之敦趨身先殉國精誠未泯節烈宜褒着
察照五典從優議覆該部知道禮部覆本復奉旨

輔臣王錫袞趨召遇害身死綱常予祭九壇加祭二壇還與他謚其贈廕祭照五典從優議覆禮部覆本謚文毅奉旨依議因時事迫促未獲奉行

公令子咨翼傳云

王咨翼係雲南右衛軍籍祿豐縣學生卽大學士王錫袞之堂侄年甫十歲大學士撫爲長子崇禎戊辰主潘淑人哀例廕太守力辭不受願就制科乙酉歲中副車第一准選貢任大理通判後陞霑益州知州京堂考察兩迤清官第一誥封奉直大夫士沐其德民歌其恩廉潔仁慈至今猶膾炙人口先時佐父事君其功累建及大學士趨召遇害戚皆潰散奔走咨

翼獨守無寸及隻身衛父折其右臂死逾半日久而漸甦見父已爲賊害卽欲從死地下忽有醫人自來接骨調治咨翼亦因殞殮無人只得遷延忍死營治喪葬忠孝性生始終備美又重建飛鳳石橋鼎建古林書院並置義宅三所五井鹽政不爲所阻閭邑士民咸稱便焉康熙十一年壬子閏七月十八日金瘡舉發病故

及郭之建王少宰遊仙夢記

王少宰遊仙夢記

祿豐少宰王先生昆華幼敏慧勤讀時值縣考甚急隣於城內宅被火經書盡焚意甚怏怏神思倦卧村

樓夢二仙降舞衣翩躚形甚舒也揖少宰曰汝非靈素宮一道友耶我壽三百弟壽二百汝壽一百位列素天非比人世爲汝洗俗腸滌凡慮汝無驚先生果與二仙遊至井邊二仙汲水割先生腹仍以線縫其口騰空而去先生夢覺其痛以足振床响驚楊太淑人因問視焉及觀縫印果然先是祿邑學附安甯少宰尊翁食安甯廩餼携先生應童子試欺先生遠方幼學推先生於署旁錢麻坑中少宰尊翁氣不屈於萬厯壬子力請建學創修文廟擇其地於西麓焉甲寅歲相平聖殿基址見一石板覆於圓塘之上揭之有二金魚一魚乘勢而飛化龍直上一魚尙存急以

石蓋之遂建聖殿越乙卯先生遊仙夢後每試輒爲冠軍拔巍科居顯宦聲望表表著於海內後先生告歸里時流寇蹂躪中原詔起督師晉閣部趨詔至省城罹沙賊難於丁亥四月十九日殉國升遐先生先期夢二仙至貢院強先生返瑤京復第三真君之位無俟憂辱爾身爲先生曰哀奉新皇勅命盡忠報國哀之職也願仙翁恕之二仙前拽後擁推促先生騰身明遠樓上貌旌羽蓋樂隊旗從瓔塔繽紛侍衛森列雲路逍遙竟返始素之天是夜天鼓齊鳴星殞如斗大墜於西南之分野嗚呼先具靈根繼遊仙夢文章命世忠貞自矢人事旣盡復登天仙豈偶然哉先矣

人倫師表洵哉家國儀型誠宜俎豆千秋永示褒榮

萬古

並公父知我封翁行述

知我府君行述

吾家世爲陝之華陰人始祖仲寬以良家子從潁川
侯尅滇功授右衛冠帶總旗屯田祿豐子孫遂家焉
幾傳至高祖用常公恢舊業而族愈滋先大父柏樓
公纘承厥志益拓前修以嘉靖丙寅歲二月二十二
日生先君先君諱勸士字宏舉號知我聰穎天植過
目成誦猶嗜學甘貧青燈魚目危坐一小樓達旦不
寐故未壯而髮鬚皤然早年遊泮負笈百里外從葆

案朱先生遊歷試滇闡不遇遂傳易里中所著有經
書解易學箕傳天外奇集養儉手抄並哀次覽翠樓
集八册覽翠者先太父柏樓公所作也公烟霞之餘
不忘水木選勝建祠以永孝思祠之後仍爲樓以眺
望吟咏此集其合而筆之者先君弟兄凡五人先君
行四式相敬好篤於古誼以媿先祖先祖真率坦夷
喜怒不介於色先君奉之必得其歡心以故先祖妣
張孺人年八十時常撫不孝孤曰爾父自束髮來只
知讀書一路行坐愁如見博戲者足爲却逢婦女面
若赭然爾祖愛之從來不曾恚視一目則家君之守
身蓋天性然矣持論侃侃不阿接物平易中具饒嚴

日江百三各邑卷之二
毅鄉人士愛之畏之往萬曆戊申逆鳳之變做邑彈丸煨燼靡遺四圍盜起都門鄒南臯先生亦從田間起首謁之相與脛腕時艱所談救時之務有急著當家澄清武源攻守戰具效虜種種諸論南臯亦延款者久之而先君不再往見也及瓜不孝孤偶博一第改館職鄉親友咸勸止之先君曰官無崇卑行義一也奈何以兒一第遽止遂俛就劍川訓終以萬里遊子天涯落寞戀不忍別雖邁病而枕中書猶不釋手於十月初五日卯時竟見背矣嗚呼痛哉痛哉先君元配楊氏卽不孝母乃邑廩生楊有恒女生子三長不孝錫袞娶儒官潘廕女次錫玉尙幼聘易門縣王

可立女錫鏞聘廩生宋學祁女女二長適廣通縣本爲楠男木起鳳次適湯用中男湯至惠俱儒業不孝生女一長許聘廩生束玉男束世鑑次尙未字先君之來爲不孝來先君之留亦爲不孝留坐致棲遲帝鄉一夕千古許大願力毫髮未償則不孝孤固天地間一大罪人也時奉素輜返故丘卜葬於祖塋西山之麓聖恩浩蕩僅撮遺行二三乞名公一言以闡幽光以徵先德錫袞等死且不朽寓京都承恩寺不孝錫袞泣血頓首謹狀

珍藏行篋詰朝策蹇過征于役邊陲四閱月始返省退食餘間追述往事輯纂成編嗟乎公之勳烈載在史冊

田漢臣五命目録
漣涕吁嗟甚哉識者於斯又爲之惜其才而悲其遇何也
蠢茲逆蘭實逼處巴畜異狡窺匪伊朝夕豈有所愛而不
肯發趙瑤出虎鍾離化鳩公用兼之故足恃耳自公捧檄
入省闡而酋謀決又中丞民移鎮駐秦有易酋心而酋謀
益堅迨及公歸是云無所向使公不離巴有以待賊未至
議備旣至議防綢繆密而巴郡安公可不死又使難發公
尙未歸泣廷糾師間道設伏出其膽識一舉而殲諸酋魂
并安會城公亦可不死又使公言策獲行於撫道操縱有
法不卽決裂以俟公歸猶徐議收拾而將吏仍安公又可
不死之三者不能得之於當日故曰公遇之悲有如此迺
公所以死則處之有其道矣聞變入境在戈戟瀰漫之日

輕車博帶詩云委蛇其神聞甚且大義規賊首以國恩國
法爲言其辭安甚卒之賊亦相顧貽聘動色戒以無傷我
公而公終不以此小屈其氣又浩甚置推椿折不懈匪石
之貞鶴唳鵲啼共解同仇之憤惟其誠合所以義生故曰
公才足惜又如此間嘗爲之吁衡今昔俯仰天人嘗謂國
家不幸而多死節臣使人至疑於造化又大不幸而鮮死
節臣使人隱痛於人心人心者造化之根柢本固則基凝
本濁則流涸是故誼辟英君終不容置此於不問古善問
者有若漢高之於丁固唐宗之於宇文周主之於樊愛能
等或披其隱曲或斥其生平或并屏其黨與而要之不如
我高皇帝之於危素老臣冷冷輕輕直以三字香名洗換

萬年遺臭自是而往遜國虎爭慙胡豹變莫不隨時隨地
霞舉雲蒸所謂廉恥立而埋道明提於影響教化行而奸
邪正凜彼隄防如茲今日顯有昭揭聖天子於公其猶是
行古之道與若乃吉凶感謀甘處不才之本初終易慮遂
成中變之絲泡影豈乎金石爲裂瞻拜祠下有餘泚矣祠
在劍治西金華麓下賜塋不數里而送湖嶽日星回環映
帶考其始繫公外大父制史張公宏光舊廬也公名高選
字讓字萬歷己未進士父汝元封如公官繼慈太孺人劉
氏如恭人徐氏子賜女泥金及小姐義僕段黑子以闔門
靖義今奉詔全祀焉例廼備紀爰繫以辭

辭曰聞公降夕之庭前有神紳笏端且虔載舞載揚綠緋

縷人疑香鼓或生天招引吾家李鄴仙須臾影隱眾忻然
頭角崢嶸日異年紅綾光罩藉盤餅百丈錦纏芙蓉川突
來狼豕蹂花筵哀鴻馴雉不曾眠鳧鳥乘風羽化翩街丹
雞犬逐紫烟鳳書層疊破重元下指蒼松與古榭千秋圍
繞白雲邊

穀貽彙序

紫閣陶君一門父子兄弟虎繡霞蒸輝煌仕學既先後表
異迭以宦績著中原迺其意念深有以自下諄諄不欲文
鳴之訓贊廷先生實首勒之告誠繼承重講豫教輒鄭重
養蒙圖說一編不置也養蒙圖者先生年友涂揆字先生
所註涂先生善註不善傳爲人易之以傳易者勿論也陶

氏貽彙具在遂得與近代陸楊袁呂諸懿則並追顏氏而
上接紫陽小學之傳快哉此圖重開生面然非贊廷先生
意也先生一往樸納不肯與諸前賢角勝義矧與鄉先輩
爭空名先生曰此圖可傳而已矣卽先生孫若嗣亦曰此
圖可習而已矣讀其彙想見其人而貌恂恂而衷敦敦而
言沈沈天賦罔逋人田不芸似不見一家一身外有所謂
人間世者畢竟善氣映帶蘭移在砌鳳鳴在庭此亦憲古
實獲無意爲文而文生之象也此象未可多得中外交訐
之曰乃有拔本塞源之謀明旨煌煌懸小學以爲風俗人
才計道固應爾上職要下或不能詳虛齋有言無以養之
而急於用所謂不待其熟而舍也雖有異質不成異才東

坡有言好古無術知有教化而不名實之所存卒使民好
文而媮相高姣詐此又儒者之過也篤近舉遠挈領分條
而後迺奉性命還之諸人奉法守還之一人奉渾沌還之
生人者之人則無如此彙明備紫園君實繼厥緒猶懼其
跡於文而比於鳴也語曰得灑氣之門所以收其報知元
神之囊所以韜其光文心彌抑文種彌揚君家不退先生
抑又進酣此道久矣請就而質焉將無曰青蘊吾家物外
人那得知饒舌哉王生也慮行者之惑而又重爲之文崇
禎甲戌孟冬

日涉園五全目錄
網羅珊瑚鄉哲聲教有神契荔扉儀雅相步趨我慚放廢
百無用自憐嗜古成狂迂開編讀罷三歎息起看秋月光
翠湖

昆明施汝欽敬題

詩集

祿豐王忠節公著

鄉後學李根源鈔輯

風節亭

兀坐風節亭萬古日日至焚香告皇天墮我烈皇淚新君
飛海甸昇臣恢勩事臣哀血性存封疆慚大吏閨中弱息
流饒有鬚眉志根源按公妻妾俱先公死難臣哀復何言安能死魑魅

根源謹按今雲南省城北門內貢院右側空地即風

節亭遺址也

自誓

志圖滅賊○山河賊黨無端舞叛戈指日誓天惟報國一
誠○○○頽波

天○重○累重○肯作投戈拜舞人三百年 ○國破西
風血淚向長陵

顛解卧龍卧不起昨夜夢入彩雲裏彩雲化作五朵雲雲
中綽約天仙子天仙甲馬紛來遊彩雲繚繞碧雲愁似話
當年昇天事丹心碧血涕交流涕流冥漠自今古浩劫循
環船寰宇人心不死有傳人破涕爲笑沐公墅

黔國沐氏九龍池別墅在雲南省城承華園今之講
武堂也騰越

邱泉部即理董堂事就沐墅遺址之一部葺爲小園以
憇同志休沐日宴集名流鄉先達不佞叨陪縱譚節
誼出示所輯明滇南五名臣遺集敬題長句以志景
仰而申憑弔云

宣統二年歲在上章奄茂日南至湘西黃膺鹿泉氏識

逃鼠蝨勾然聲
歎震風雷五賢
踵起高文炳一集

編成正氣迴戒六
搜牢附印志燈窗
快讀使心開

騰越李君印泉以輯刊前明
南五名臣遺集見示自叙與小圃
學使叙源於其言之謙劣而無
贅辭所慨所養溢為韻語謹
書集尾並質

印泉 劍川趙藩



